



## Balutis

A zuiâ di balutis i vûl smire e jessi bulos. Agnorums indaûr si zuiave cui claputs starondâts dal flum, o fasint su balutis di tierecuete o, plui di spes, balutis di veri colorât, come chês che si cjatin ancje cumò. Bisugnave jessi bogns di cjapâ la balute dal avversari passant framieç di provis di abilitât, intune sorte di biliart. Si doprave il tîr libar o si rindeve plui dificil il dut fasint dôs busis inte tiere. Par tirâ la balute, la tecniche e jere di pleâ il dêt indic e tirâ cu la ongule dal poleâr, viers l'obietîf.

Cjamp di zûc: dôs busis te tiere, a distance di 3 metris, plui o mancul. O si sielç di zuiâ a butâle dentri inte buse di chel altri, e ogni volte si vuadagne une balute; o si zuiave libar. In chest câs, clamât "tiche spane", ma ancje in altris manieris, si à di fâ la conte (*Ae baie tiche baie in par messe tuc muc poc*) par decidi cui che al tire par prin e podopo chel altri al cîr di colpîji la bale. Si podeve lâ indenant cussì par oris...



## Canucje

Un zûc tra i plui facii, ancje chest di smicje, che no ducj a vevin.

Lis manieris par meti adun l'impres di fonde, la canucje, a jerin une vore. Tal imprim si fasevin cul carton, o cuntune ramascje di saût, che e jere facile di svuedâ de sô medole, ma cumò la plastiche e à dât une vore di pussibilitâts in plui: par esempi un tubo rigjit di plastiche robât a un implant eletric.

Come cartucjis si dopravin pomulis, balutis di cjarte, samencis lis fusetis, o stupins, ven a stâi dai pirui di cjarte misturade e mastiade cu le salive, e cualchi bintar, al sucedeve, al ficjave dentri une gusele.



## Fusîl cul elastic

Tierç zûc di smicje, ancje chi si va sul classic, la vuere, ma doprant ce che si cjatave par fâ

su l'imprest fundamentâl par corisi daûr e platâsi. Il fusîl, difat, al è un supuart di len, fat diventâ slis e lavorât in maniere che l'elsatic al sedi macil di meti e di tirâ, ma al rivi ancje adore a cjapâi intor ai avversaris. Il zûc, difat, al è fat di une bataie dulà che bisugne colpì chei altris zuiadôrs, come se si fos in vuere.